

Tong

Vatan yagonadir, Vatan bittadir!

YULDUZI

O'zbekiston Respublikasi bolalar va o'smirlar gazetasi

Gazeta 1929-yil 1-avgustdan chiqa boshlagan

2008-yil
10-mart
№ 11
(66656)

Bahoroyningelchisi — jajji
qaldirg'ochxushxabarkeltirdi:
Gazetamizo'quvchilarisoni
fevraloyidayana 1119 nafarga
ortibdi.

Obunadavometyapti.
Mamlakatimizningistalganaloqa
bo'limlaridasevimlinashringizgasizham
obunabo'lishingiz mumkin.

Yuragimdan yorib chiqdi,
Boychechakning mingildizi.
Boshim uzra charaqlab tur,
Ko'nglim yorit, «Tongyulduzi»!

Obunachilarimiz
ro'yxatining boshidan
tushmay kelayotgan
farg'onalik, andijonlik
hamda samarqandlik
o'quvchilarimizga o'z
minnatdorchiligimizni
bildiramiz.

Nashr
indeksi —
198

Anor

*Bu na gumbazdur eshigi, tuynugidin yo'q nishon,
Necha gulgun pok qizlar manzil aylabdur makon.
Tuynugin ochib alarning holidan olsam xabar,
Yuzlarida parda tortuqliq turarlar, bag'ri qon.*

UVAYSIY

1779 – 1845-yillarda Qo'qonda yashab ijod etgan shoira momolarimizdan biridir. Uning ismi Jahon otin bo'lib, otasi marg'ilonlik fozil kishi edi. U Zullisonayn, ya'ni o'zbek va fors tillarini mukammal bilgan. «Voqeoti Muhammad Alixon», «Karbalonoma» she'riy hikoyalarini yozgan. Undan bizgacha mukammal devon yetib kelgan. Devondan 2 she'riy hikoya, 269 g'azal, 29 muxammas, 55 musaddas va 1 murabba o'rin olgan.

Umrning so'lim bekati

**BAXTGA YETAKLAGAN
18 YOSH**

Ra'no YARASHEVA, O'zbekistonda xizmat ko'rsatgan artist, O'zbek milliy akademik-drama teatri aktrisasi:

– Insonga har qanday vaziyatda ham orzular kuch beradi. O'n sakkiz yoshda mana shu orzular o'z kuchini ko'rsatadi va yurakni nafasat olamiga boshlab kiradi. O'n sakkiz yosh, ya'ni umrning so'lim bu bekati men uchun ham orzular bekati edi. Bu yoshda men orzular og'ushida edim: hayot eng toza ranglarda ko'rinar, uchragan oddiy bir umid uchquni ham qalbmida alangaga aylanardi, butun hayotimni xuddi kinolentaga yozilgandek orzularimda yaratgan edim. Orzularim menga kuch berardi, o'zimni ko'p narsaga qodir sezardim. San'at institutida o'qishni, aktrisa bo'lishni, kitoblarim chiqishini, hamma meni tanishini, shirindan-shakar farzandlarim, mashinam bo'lishini istardim. Taqdir taqozosi bilan ayni o'n sakkiz yoshimda meni turmushga berishdi. O'zimda katta kuch sezgan edim, afsuski, ancha o'jiz ekanman. Bor kuchimni orzularga emas, oilamga sarfladim. Baribir meni orzularim tark etmadi. Umrning bahoridagi orzular ro'yobga chiqa boshladi. O'qishga kirdim, asta-sekin sahnaga ko'tarildim. Ko'pchilik tanishlarim iste'dodim, harakatchanligim, har bir ishga katta mas'uliyat bilan kirishganim tufayli mashhurlik o'zi meni izlab kelganini aytishdi. Menimcha, mashhurlikim sababi bu emas. Hammasi o'sha eng bokira damlardagi niyatlar mevasi deb o'ylayman. O'sha beg'ubor paytlarda bironing baxtsizligini emas, faqat o'z baxtimni niyat qilganimni eslasam, ko'p narsa niyatga ham bog'liqligiga iqror bo'laman.

Hozir judayam baxtliman, o'n sakkiz yoshimda faqatgina xayolimda bo'lgan barcha narsaga erishdim, meni o'n sakkiz yosh xayollari baxtli qildi, desam aslo mubolag'a bo'lmaydi.

**HISSİYOTLAR ASIRIGA
AYLANSA**

Insonga umr bir marta berilganidek, o'n sakkiz yosh ham bir bor keladi. Bu yoshda inson hayot pillapoyalaridan yana bir qadam yuqorilash bilan birga, mustaqil hayotga ilk qadamini tashlaydi. Bu davrda har qanday inson ham hissiyotlar asiriga aylanadi, orzu bog'larida sayr qiladi. O'zida o'zgacha kuch sezib, orzulardan qalqon yasab, umidlari sari odimlaydi. Bu yosh bilan bog'liq har kimning o'z fikri, o'z xotiralari bo'ladi. 18 yoshimda men Milliy universitet talabasi bo'ldim. Bu hayotimdagi eng katta orzuimni ushali edi. Tengdoshlarimga hayotlaridagi eng go'zal yosh – 18 yoshlarini bir umr yodda qoladigan qilib shod va baxtiyor o'tkazishlarini tilayman.

Farhod UMAROV,

O'zMU jurnalistika fakulteti 1-bosqich talabasi

O'ZI JUDA YOSHGINA

Bugungi yoshlarimiz orasida yaxshi ta'lim-tarbiya olib, o'z kelajagini yaratish yo'lida tinib-tinchimaydiganlari ko'p. Ana shunday o'quvchilardan biri Qobiljon Inomovdir.

Qobiljon Namangan shahridagi 5-umumta'lim maktabining 7-«D» sinfida a'lo baholarga o'qiydi. Sinf rahbari Dilfuza opa Qambarovadan ko'p narsalarni o'rganishga harakat qiladi.

– Men Dilfuza opadan minnatdorman, ko'proq bizni kitob o'qishga undaydilar, – deydi Qobiljon Inomov.

Darhaqiqat, kitob bilim bulog'i. Uni qanchalik ko'p o'qilsa, shunchalik ko'p bilim olinadi. Bilimdon

Qobiljon ham kitobni sevadi. Ayniqsa, ertak kitoblarni o'qishni kanda qilmaydi. Rus tili va rasm sizishga qiziqadi. Bu borada u Namangan shahridagi 1-O'quvchilar ijodiy markazining faol a'zosi. «Yosh musavvir», «Rus tili» to'garaklarida ustoz Fotima Isomitdinovadan mukammal bilim olmoqda.

– Hunar o'rganish niyatida 5 yildan buyon chevarchilikka o'rganyapman, – deydi Qobiljon suhbatimiz jarayonida. – Ustozim Obidxon chevar. Haftada 4 kunni chevarchilikka ajrataman. Hozir o'g'il bolalar uchun kostyum-shim, kuylak tikishni bilib olganman. Kurтка tikishni esa endi o'rganyapman. Bundoq o'ylab ko'rsam, doimo

sog'lom yurish uchun sport ham kerak ekan. Shu bois, suzish va karate mashg'ulotlariga ham vaqt topaman.

Yoshgina Qobiljonning fikrlarini eshitib, shu narsaga amin bo'ldik, bo'ladigan bola boshidan tayin. Haq gap. Nazarimizda, ushbu maqol go'yo Qobiljon singari yoshlarga qaratila aytilgandek. Sababi, o'zi kichik bo'lsa-da, aqli teran bu bolaning orzulari ko'p. Oydin maqsadlari yo'lida esa astoydil o'qib izlanyapti. Biz esa uning kelajagi porloq bo'lishini tilab, omad yor bo'lsin senga, Qobiljon, deb qolamiz.

Kamola NOSIROVA,
Namangan

MAKTABIMIZDA TEATR OYLI



Sizning maktabingizda hech teatr oyligi o'tkazilganmi? Uchtepa tumanidagi «Orom» nomli bizning maktabimizda rahbarimiz Gulnora opa Qo'chqorova tashabbuslari bilan shunday oylig o'tkazildi. Biz 7-«G» sinf o'quvchilari tarbiyaviy ahamiyatga ega bo'lgan «Xazon bo'lgan umr» spektaklini namoyish etdik. Har bir sinf turli mavzuda tayyorlagan sahna ko'rinishlaridan xulosa chiqarib, fikr almashdik. Ishonasizmi, oramizda yaxshigina san'atkor do'stlarimiz ham ko'p ekan.

Hulkar SOBITOVA

IQTIDORLILAR ANJUMANI


Bir necha yildan buyon Toshkent viloyatining Bo'stonliq tumanida o'tkazib kelinayotgan «Iqtidorli yoshlar anjumani» bu yil yana-da ko'tarinki kayfiyatda kechdi. Ishtirokchilar adabiyot, san'at, hunarmandchilik, rassomchilik va sport yo'nalishlari bo'yicha bellashdilar.

Anjumanda ishtirok etgan iqtidorli yoshlar orasida E'zoza Ziyaboyeva ham bor edi. San'at yo'nalishi bo'yicha g'oliblikni qo'lga kiritgan E'zozaning xursandchiligiga sherik bo'lib, taassurotlari bilan qiziqdik:

– Bunday katta anjumanda birinchi bor ishtirok etishim, taassurotlarim bir olam. Ko'plab do'stlar ortirdim, o'zaro fikr almashib, yutuq va kamchiliklarimizni o'rtoqlashdik. Biz yoshlarning bo'sh vaqtimizni mazmunli va samarali o'tishini ta'minlaydigan bunday anjuman va tadbirlar soni yana-da ko'payadi, degan niyatdaman...

Biz esa E'zozadek iqtidorli, harakatchan va intiluvchan yoshlar safi yana-da kengayishidan umidvormiz.


Umida MURODOVA



ZAMON TALABLARIGA MUVOFIQ

Uchtepa tumanidagi 287-umumiy o'rta ta'lim maktabida rus tili va adabiyot bo'yicha seminar-trening bo'lib o'tdi. Seminar ishtirokchilaridan 287-o'rta maktab o'qituvchisi M.Fattohova, 62-o'rta maktab o'qituvchisi T.Gribova boshlang'ich va katta sinflarda tajribali darslar o'tkazishning natijalari to'g'risida o'rtoqlashdilar.

SOG'LIQNING KUSHANDASI



Tabiatsiz hayot yo'q. «Toza havo – tanga davo», deb shuni aytisalar kerak-da. Quyosh charaqlab kulib tursa, havo toza, musaffo bo'lsa, yon-atrof chiroyli ko'rinadi ko'zlarimizga. Tabiat shunday mukammal yaralganki, ko'rib ko'zingiz quvnaydi.

Ko'pincha tengdoshlarim yoki ba'zi odamlarning tabiatga to'g'ri munosabatda bo'lmaganini ko'raman.


Ekologiyaning buzilishiga ham aslida o'zimiz sababchimiz. Ko'pincha ozodalikka rioya qilmaymiz. Mana, bir oddiy misol, ko'pchilik kattalar ham, ayniqsa, biz bolalar duch kelgan joyga pista po'chog'ini, konfet yoki muzqaymoqning qog'ozini tashlab ketaveramiz. Shifokorlarning aytishicha, ko'pchilik kasalliklar ozoda yurmaslikdan kelib chiqar ekan. Biz nafas olayotgan hayotning toza bo'lishi ham o'zimizga bog'liq. Shuning uchun, aziz do'stim, hech qachon tabiatga bemehr bo'lmagin. Boshqalarni bilmadim, men baribir tabiatni yaxshi ko'raman.

Mardon RAUPOV,

Toshkent shahar, Hamza tumanidagi 226-maktabning 5-«B» sinf o'quvchisi

Oramizdagi o'quvchilar

Yoshlar



«O'ZBEKISTON»

nashriyot-matbaa ijodiy uyida

1. Keyingi yillarda nashriyot-matbaa uyida qanday o'zgarishlar ro'y berdi?
2. Yoshlar matbaachilik sohasini qanday o'rganyaptilar? Qaysi o'quv yurtlari bilan hamkorlik qilyapsizlar?
3. O'zingiz qanaqa kitoblarni o'qishni xohlaysiz?
4. Mustaqillik yillarida juda ko'p yaxshi an'analar paydo bo'ldi. Yurtimizda har bir yil o'ziga xos nomlar bilan atalib, unga javoban tashkilotlar o'zicha sovg'alar tayyorlaydi. O'tgan yilda gazetamizda juda ko'p iqtidorli yoshlarning she'r va hikoyalari bosilib chiqdi. Ularning eng saralarini kitobchalar shaklida chop etishga yordam berasizmi?

Zoir ISAJONOV,

«O'zbekiston» nashriyot-matbaa ijodiy uyi direktori:

1. Men bugungi yoshlarimizga, shaxsan «Tong yulduzi» gazetasining muxlisi bo'lgan baxtiyor ukajonlarim va singillarimga havas bilan qarayman. Ularga qanchalik ko'p imkoniyat va shart-sharoitlar yaratib berilgan. Mazkur yilning Prezidentimiz tomonidan «Yoshlar yili» deb e'lon qilinishining o'zi juda katta voqea bo'ldi va uning Vatanimiz tarix sahifalarida oltin harflar bilan yozilib qolishi shak-shubhasizdir.

Endi savolingizga kelsak, mustaqillikdan so'ng nashriyotimizda keng imkoniyatlar yaratildi. Avvalo, noshirlar, ishchi-xizmatchilarimiz ma'naviy jihatdan dunyoqarashlarini qayta qurdilar. Matbaa korxonamizda esa dunyoning mashhur «HEIDELBERG» firmasining «SPEED MASTER-10-4», «SPEED MASTER-74-2», «PANUDA-105-4», «PLANETA VARIMAT POLYGRAPH», «MANUGRAPH» firmasining «ZIRKON FORTA 660 POLYGRAPH», «KARASET» yangi mashinalari o'rnatildi. Bularning evaziga kitob va boshqa mahsulotlarimizning sifati, rang-barangligi talab darajasida yaxshilandi hamda «STARLAYN – C-30» gazeta chop etish bosma mashinasi ishga tushirildi, eng yangi raqamli texnologiyaga asoslangan matbaa markazi foydalanishga topshirildi. Buning evaziga korxonamizda iqtisodiy ko'rsatkichlari 30-40 foizga ko'tarildi. Jumladan, «Gulxan», «G'uncha», «Sog'lom avlod uchun» va boshqa sizlar o'qiydigan nashrlarimizning ham rangli va rang-barang chop etish imkoniyatiga ega bo'ldik.

Shuningdek, matbuot korxonamizda yangi raqamli texnologiya asosida ishlaydigan markaz ishga tushdi. Bu yerda kichik tirajdagi kitoblar, plakatlar, taklifnomalar, bukletlar bir necha soat ichida tayyorlab berilishi mumkin.

2. Hamkorlikda gap ko'p. Buning biz uchun yana bir muhim tomoni shuki, o'z ishining ustasi

bo'lmish mutaxassislar o'z mini yoshlar egallar ekan, ular ham shu sohaning har bir jihatini puxta bilishlari zarur. Shu jihatdan, nashriyot uyimiz juda ko'p tashkilotlar, o'quv yurtlari, jumladan, O'zbekiston Milliy universiteti, Jahon tillari universiteti, Toshkent yengil sanoat va to'qimachilik institutlari bilan mustahkam aloqa o'rnatgan. Juda ko'plab talabalar tahriryatlarimizda, ishlab chiqarish bo'limlarimizda o'z amaliyotlarini o'taydilar. Keyingi yillarda bir qancha talabalar bizga ishga keldi. Demak, hamkorligimiz besamar ketmayapti. Bunday hamkorligimizni «Yoshlar yili»da yana-da kengaytirib boryapmiz.

3. Badiiy kitoblarni o'qishga ko'proq qiziqaman, ammo ish yuzasidan boshqa o'nlab kitoblarni ham ko'zdan kechirishga to'g'ri keladi. Chunki, bizda rus va boshqa qardosh tillarda ham kitoblar nashr etiladi.

Keyingi ikki-uch yil ichida «O'zbekiston taraqqiyot yo'lida», «Islom obidalari», «Xiva», «Buxoro», «Samarqand», «Zamonaviy O'zbekiston miniatyurasi», «Bobur», «Jaloliddin Manguberdi», Pirimqul Qodirovning «Amir Temur siymosi», Tursunoy Sodiqovanning «Atirgul isi» va boshqa o'nlab kitoblarni nashr etdik.

Bu kitoblarning har birini diqqat bilan o'qib chiqib, juda ko'p yangiliklar oldim. Ularni siz ham o'qib chiqarsiz, albatta. Amir Temur bobomiz aytganidek, «Bilagi zo'r birni yiqitar, bilimi zo'r mingni». Umuman olganda, kitob insonni baxtlar vodiysiga boshlab kiruvchi eng noyob vosita. Faqat unga oshno bo'lishni bilish kerak, xolos.

4. Bu yil yoshlarga atalgan sovg'alarimiz ko'p. Hozirgacha juda ko'p badiiy kitoblarni, darsliklarni chop etib, o'quvchilar qo'lga yetkazdik. Prezidentimiz iqtidorli yoshlarni har tomonlama qo'llab-quvvatlashni doimo takror-takror ta'kidlab o'tadilar. O'zbekiston nomini dunyoga tarannum etayotgan yigit-qizlarning nomini eshitganimda, beixtiyor ular bilan g'ururlanaman. Taklif berayotgan ekansizlar, albatta bu ezgu ishga qo'limdan kelgan barcha yordamimni ayamayman.

Kitoblar olamiga sayohat

Aziz o'quvchilar!

Azim poytaxtimiz Toshkentning ulug' shoirimiz Alisher Navoiy nomi bilan ataluvchi muazzam ko'chasida, Xadra maydoni yaqinida «O'zbekiston» nashriyot-matbaa ijodiy uyi joylashgan. Ushbu nashriyotda chop etilayotgan mamlakatimiz ravnaqi, farahbaxsh kunlarimizdan hikoya qiluvchi sara asarlar, turli adabiyotlar, xususan, darsliklardan foydalanib, bilimlaringizni oshirib borayotganingizni yaxshi bilamiz. Bu nashriyot haqida ko'proq bilishni xohlaysiz, albatta. Shu bois, bugun quyidagi suhbatni e'tiboringizga havola etyapmiz.



GAZETA SAHIFALAYOTGANDA, Toshkent shahar, Shayxontohur tumanidagi 59-o'rta maktabning 7-, 8-, 9-sinf o'quvchilari «O'zbekiston» nashriyot-matbaa ijodiy uyida mehmon bo'lishib, bosmaxona ishlari bilan tanishdilar. Bu yerda mehmon bo'lib turgan koreys mutaxassislar bilan ham suhbatlashdilar.

Biz ularni savolga tutdik:

– Bolalar, taassurotlar qanday?

A.YOQUBOV, 9-«D» sinf o'quvchisi:

– Kitob bosilish jarayonlari, qudratli mashinalar bizni hayratga soldi.

Sh.ABDURAHMONOVA, 7-«D» sinf o'quvchisi:

– Bugun biz uchun haqiqiy sayohat bo'ldi. Hammaga rahmat!

Shuningdek, T.O'tkurov, U.Xoliqov, E.Sharipov, N.Sodiqova, D.Imomaliyeva, I.Alimova, S.Ro'zmetova va D.Abdusalilova kabi o'quvchilar ham minnatdorchilik bildirishdi.

Tahririyatimizga kelayotgan maktublar orasida «Bizning to'garak» sahifasiga», deb yozilganlari ancha to'planib qoldi. Maktublar soni shu qadar ko'pki, asti qo'yaverasiz. Gazetangiz esa bitta! Lekin mening maktubim chiqmas ekan-da, deya sira xavotirga tushmang. Ijodiy mashqlaringiz yaxshi bo'lsa, navbati bilan ulardan albatta foydalanamiz. Quyida e'tiboringizga tengdoshlaringiz ijodidan namunalar havola qilyapmiz. Siz ham yozing, maktublaringizni kutamiz.


SIZNI DOIM TOG' BILDIM



Ona – siz cheksiz ummon,
Umidlarim tiz cho'kkan.
Ko'z ochgan bu dunyoda,
Ko'nglimga mehr to'kkan.

Sizni doim tog' bildim,
Dilimdagi bog' bildim.
Hayotim yo'llarida,
Siz-la ko'nglim chog' bildim.

Men uchun sha'n so'raysiz,
Cheksiz Vatan so'raysiz.
Ko'ksingiz baxt uyasi,
Menga osmon so'raysiz.
Saodat MUHAMMEDOVA



MENING TIKONLI DO'STIM

– Kel do'stlashamiz, – deya qo'lini cho'zibdi unga.
– Menga aityapsanmi? – ajablanibdi Kaktus. – Mendek badbashara, hammayog'i tikonlar bilan qoplangan o'simlik bilan do'stlashmoqchimisan? Biror yeringga nogoh tikonim kirib ketsa, men bilan do'stlashganingga afsuslanmaysanmi?
– Ha, senga-da, – debdi samimiy ohangda Banancha. – Do'stni tashqi ko'rinishiga qarab tanlamaydilar-ku.
Uning bu gapidan Kaktusning boshi ko'kka yetibdi. Chunki shu paytgacha uning hecham do'sti bo'lmagan ekan-da.
Ikkovlon o'rmon bo'ylab sayohatga o'tlanishibdi. Banancha juda quvnoq ekan, yo'l bo'yi qo'shiq kuylab, turli hangomalardan so'ylab, do'stini juda xursand qilibdi. Kaktusvoy shunday ajoyib do'st topganidan ich-ichidan quvonibdi.
Uzoq yo'l bosib, bir omborda tunashga qaror qilishibdi. Azbaroyi charchaganlaridan bir zumda uxlab qolishibdi. Shu payt bir bahaybat Kalamush Bananchani uyiga sudrab keta boshlabdi. Buni sezib qolgan Kaktusvoy do'stiga yordamga oshiqibdi. Ninalarini sanchib, Kalamushni quvib solibdi.
Endi quvonish navbati Bananchaga kelibdi: do'st tanlashda yanglishmaganidan juda suyunibdi.

Furqat KARIMOV,
Sirdaryo viloyati, Boyovut tumani, Boyovut qishlog'i

Ayni qahraton qish pallasi edi. Borliq op-poq qor bilan qoplangan, atrof jimjit. Faqat uzoq-uzoqlardan bo'rilarning uvillashi eshitilardi.

Kechga yaqin kattakon zotdor kuchugim bezovta bo'la boshladi. Ko'nglim g'ashi bo'lib, dadamning yoniga bordim. Shu payt

qo'radagi qo'yalarimiz ham dupurlashib ma'ray boshlashdi. Dadam miltig'ini olib, qo'ra tomon yugurdilar. Qo'raga kattakon bo'ri oralagan ekan. Sharpamizni sezdi chog'i, qo'radan sakrab qo'cha boshladi. Dadam bir-ikki o'q uzdilar, tegmadi. Ichkariga kirib qarasak, bo'rdoqiga boqayotgan kattakon qo'yimizni bo'g'izlab ketibdi. Dadam shuncha mehnatlarimiz behuda ketganiga achinib, baqirib yubordilar...

Bu bo'rining qo'ramizga qilgan birinchi hujumi emasdi. Men bir narsaga sira tushuna olmasdim: nega bo'ri aynan bizni holi-jonimizga qo'ymaydi?..

Bundan qattiq achchiqlangan dadam kechalari uxlamay poyloqchilik qila boshladilar. Uchinchi kecha bo'ri yana paydo bo'ldi. Dadam bu safar uni bexato nishonga oldilar va bo'ri yiqildi. Borib qarasak, ona bo'ri ekan. Keyinchalik bilsak, Aziz aka degan hamqishlog'imiz ona bo'rining bolalaridan birini o'ldirgan va bizning hovlimiz orqali o'z uyiga o'tib ketgan ekan.

Bo'rilar juda qasoskor bo'lishadi. Aziz akani shu hovlida yashaydi, deb o'ylab, undan o'ch olmoqchi bo'lgan ekan.

Bu voqeani eshitgan dadam, «Eh, attang-a!» deya boshlarini sarak-sarak qilib qo'yidilar.


Karomat XO'JAAHMATOVA,
Jizzax viloyati, G'allaorol tumani, Zarg'oq
qishlog'idagi 29-maktab o'quvchisi

BULBULJON

Senga atab bog' yaratdim,
Chamanim gullarga kon.
Ko'klam keldi yurtimizga,
Sen ham kelgin, bulbuljon.

Shoxdan shoxga ko'chib, sayrab,
Quvonch ulash bizlarga.
Yurtim bag'ri to'lib ketsin,
Baxtli o'g'il-qizlarga.

Maftuna JO'RABEK qizi,
Alisher Navoiy nomidagi Nafis san'at
litseyining 4-sinf o'quvchisi



O'CH (Hikoya)

ONA BO'LIB YUPATAR QUYOSH

Osmon yig'lar o'pkasi to'lib,
Yer bag'riga yog'ilar ko'z yosh.
Bulutlarni quvgach, falakni
Ona bo'lib yupatar quyosh.
Ko'k rassomi yetti xil rangda,
Surat chizar – nomi kamalak.
Bo'y cho'zadi mayin maysalar,
Majnunatollar sochi jamalak.
Soydan oqar sellar hayqirib,
Hayron bo'lib qirlar boqadi.
Baland bo'yli yong'oq daraxti,
Shokilali sirg'a taqadi.
Yomg'irdan so'ng atrof yana-da,
Go'zallashar, jumbushga kelib.
Olislarga ko'klam salomin,
Yetkazadi shabboda yelib.

Lobar G'ANIYEVA,
Qashqadaryo viloyati,
Shahrisabz tumanidagi
48-maktabning 11-sinf o'quvchisi

O'ZBEGIM

Mehri dengizdek tubsiz,
Quyosh nuridek cheksiz,
Suhbati asal shaksiz,
O'zbekim ayollari.
Purma'nodir so'zlari,
Mehr to'la ko'zlari,
Davraga ko'rk o'zlari,
O'zbekim ayollari.

AYOLLARI

Erta tongda non yopar,
So'ngra yumushga chopar,
Nonini halol topar,
O'zbekim ayollari.
Yuzlari guldek kulsin,
Doim salomat yursin,
Dunyo turguncha tursin,
O'zbekim ayollari.

Umida UMRZOQOVA,
poytaxtdagi 229-maktabning
7-«A» sinf o'quvchisi

SIZ BORSIZ HAYOTIM HAMISHA BAHOR

Xavotir soyasi nigohingizda, qadamim sasiga qalbingiz intiq. Balogardon bo'lib gunohimizga, bizga o'z mehringizni etasiz tortiq.

Koinot shivirlar yuragingizda, jannatlar navosi duolaringiz. Ezgulik ulg'ayar tilagingizda, biz-chi?! Xudbin, qalbi gadolaringiz...

Orzu alvonlanar dil shafaqida, ko'zim ko'zgusida olovlar aksi. Umrinning eng go'zal zar varag'ida, ehtirosiga to'lgan hayajon raqsi.

Kutishlar to'kilar ostonamizga, bezovta dilingiz qaroqlaridan. Boqmaymiz siz kabi parvonamizga, baxt izlab ro'yoning qirg'oqlaridan.

Poyingiz gardida behisht isi bor, vujudingiz etgan muhabbat makon. Siz borsiz hayotim hamisha bahor, siz mening eng ulug' baxtim, Onajon!

Akrom MALIK,
Toshkent viloyati, Piskent tumani

OYGA DO'STMISAN, UKAJON?


Bog'larni sariq, qizil ranglarga burkab kuz kirib keldi. Yoz shovqin-suronli, zavqli kunlarini sokin damlarga bo'shatib berdi. Bolakaylar maktabga chiqib, o'yin maydonchalari huvillab qoldi.

Odatdagidek ishdan kech qaytdim. Uyimiz qarshisidagi bekatga yetganimda, ko'cha chiroqlari yongan, osmonda birin-ketin yulduzlar ko'rinish, sharqdan bir quchoq bo'lib to'lin oy balqib turardi. Nazarimda, oy meni kutayotgandek, nechundir u bilan suhbatlashgim kelardi. Ko'chadan nariroqdagi yashil maydon ko'pincha kimsasiz, tinch bo'lardi. Ayni shu joyda yolg'iz qolib, oy bilan sirlashgan damlarim ko'p bo'lgan. Ba'zida it yetaklab yurgan ayollarni aytmaganda, bu joy yozda bolalarning ovloq go'shasi – sevimli o'yingohiga aylanardi. Bolalik damlarim yodimga tushib, to'g'ri o'sha sayxonlik tomon yurdim. Qadrond o'rik ostidagi toshga o'tirdim. Bolalar g'adir-budir kekka o'rik daraxtiga «Cho'tir bobo» deya nom qo'yishgan, bahorda «bobomiz» bizni dovuchchalar bilan siylardi.

Akam, opalarim izlashsa, ko'pincha meni shu joydan topishardi. «Xayolparast, shoir bo'ladi bu bola, bizdan yashirincha she'r yozsa kerak», deya bashorat qilishar, o'zlaricha menga tanbeh bergan bo'lishardi. Xayolga cho'mib, oyga termulib turarkanman, o'rik barglari shovullab boshimga to'kildi. Hayrat ila boshimni ko'tardim. Kechagina oppoq gullarga burkangan novdalar bugun xuddi gulxandek qip-qizil, atrofda taralib

1

Shohjahon RAUPOV



Esse


turgan chiroqlar va oy shu'lasida ajib tovlanar, xilma-xil xotiralarni yodimga solardi. Shu vaqt bexos: «To'xta, baribir tutamiz, qochib ketolmaysan!» degan tahdidli ovoz eshitildi. Alanglab o'sha tomonga qaradim. Ko'p qavatli uylar tomondan bir bolakayni uch-to'rttasi quvlab kelishardi. O'n-o'n ikki yoshlardagi bola menga yaqinlashganda, qoqilib yiqildi. U o'rnidan turishga ulgurmay bolalar yetib kelishdi.

– Qo'lga tushdingmi, nomard?! – deya bolalar baqirib-chaqirib uni do'pposlay boshlashdi.

2

Davomi. Boshi o'tgan sonlarda.

Davomi bor.



Bu yerga kelayotganimda, yo'l ustida eng kamida o'n ikki joyda kecha va o'tirishlarning guvohi bo'ldim.

Professor MakGonagallning jahli chiqib pishirdi:

– O, ha, rostdan ham hamma bayramni nishonlayapti, – norozi ohangda dedi u. – Ular sal ehtiyotkorroq bo'lishlari lozim edi. Biroq, yo'q, hatto Magllar ham nimalardir sodir bo'layotganini sezibdilar. Bu haqda ular yangiliklarda gapirdilar. – U ortida Dursllar mehmonxonasi joylashgan qorong'i deraza tomonga boshini keskin irg'adi. – Men eshitdim. Ukkilar galasi... yulduzlar to'kiyotgani... Xo'sh, axir ular butkul tentak emaslar-ku. Ular nimalarnidir sezishga shunchaki majbur edilar. Qarang-a, Kentda yulduzlar yog'ilishi! Bu Dedalus Dinglning ishi ekaniga sira shubham yo'q. U hech qachon zo'r aqli bilan farqlanib turmagan.

– Ularni ayblash yaramaydi, – muloyimgina javob berdi Dambldor. – Keyingi o'n bir yil davomida shodlanishimizga sabab juda kam bo'lgan.

– Bilaman, – professor MakGonagallning ovozida jahl paydo bo'ldi. – Biroq, bu boshini yo'qotib qo'yganlarni sira oqlamaydi. Odamlarimiz o'zlarini butkul aqlsizlarcha tutmoqdalar. Ular ko'chalarda kupa-kunduzi paydo bo'lmoqdalar, to'planishib, mish-mishlar bilan mashg'ul bo'lishyapti. Buning ustiga, ular Magllar kabi kiyinib olishni hatto xayollariga ham keltirishmayapti.

U Dambldorga xuddi javoban nimadir deyishiga umidvorday o'zining tikanli ko'zlarini zimdan qadadi, lekin Dambldor indamadi va ayol so'zida davom etdi:

– Nihoyat, Siz-Bilasiz-Kim g'oyib bo'lgan ayni kunda Magllar bizning mavjudligimizni bilib olsalar, juda ajoyib ish bo'lardi. Aytmoqchi, u rostdan ham g'oyib bo'ldi, deb umid qilaman, shundaymi, Dambldor?

– Shundayligi aniq, – javob berdi u. – Shu bois bu haqiqatda bayram kunidir. Limon bo'lakchasi yeyishni xohlaysizmi?

– Nima?
– Shakarga bulangan limon bo'lakchalari. Bu Magllar yeydigan shunday shirinliklar, shaxsan menga ular juda yoqadi.

– Yo'q, rahmat, – professor MakGonagallning ovozi go'yo hozir limon bo'lakchalari iste'moliga to'g'ri keladigan fursat bo'lib tuyulmayotgandek anchayin sovuq edi. – Demak, gap nimada to'xtagandi, agar Siz-Bilasiz-Kim rostdan ham g'oyib bo'lgan bo'lsa ham...

– Azizim professor, uni ismi bilan aytishga aqlingiz yetarli deb o'ylayman. Siz-Bilasiz-Kim, Siz-Bilmaysiz-Kim deyish mutlaqo bema'nilik... O'n bir yildan beri odamlarga uning haqiqiy ismi – Volan-de-Mort deyishdan cho'chimaslikni uqtirishga urinib kelyapman.

Professor MakGonagall seskanib ketdi, biroq, bir-biriga yopishgan limon bo'lakchalarini ajratishga berilib ketgan

Dambldor, aftidan, buni sezmedi.


– Nazarimda, biz Siz-Bilasiz-Kim deganimizda, dahshatli anglashilmovchilik yuz beradi, – so'zida davom etdi u. – Nima sababdan Volan-de-Mort ismini aytishdan cho'chish kerakligini hech qachon tushunmaganman.

– Ha-ha, albatta, – professoring ovozi jahl bilan mehr ajoyib tarzda mutanosiblik kasb etardi. – Lekin siz boshqalarga o'xshamaysiz. Siz-Bilasiz-Kim sizdan – xo'p-xo'p, Volan-de-Mort yolg'iz sizdan qo'rqishini hamma bilardi.

– Menga xushomad qilyapsiz, – sokinlik bilan javob berdi Dambldor. – Volan-de-Mort shunday zo'r quvvatga ega ediki, mening unga qurbim yetmasdi.

– Faqat shuning uchunki, bunday quvvatdan foydalanish uchun siz nihoyatda... nihoyat darajada oliyanobsiz.

Gulchehra SA'DULLAYEVA
tarjimasi



Adiblar – bolalarga



Barot Isroil taniqli shoir. 1938-yilning 15-martida Toshkent viloyatining Ohangaron tumanidagi Toshsoy qishlog'ida tug'ilgan. Yigirmaga yaqin kitoblari nashr etilgan. Tanlangan asarlarining birinchi jildi «Mahliyolik» kitobi bosmadan chiqdi. Shoir bobongiz 1966-70-yillarda shu gazetada faoliyat yuritgan.

Kuni kecha tahririyatimizga tashrif buyurib, Sizga ilingan she'rlarini qoldirib ketdilar. Biz u kishiga sog'lik-salomatlik, uzoq umr, barakali ijod tilab qolamiz.

ORZU GULI

Orzu qilgan gulim ochilur,
Uni bahor boshlab kelajak,
Kulbam bo'ylab atri sochilur,
Bog'im gulga serob bo'lajak.

Mening birla bahor hampesha,
Orzu gulin ekdim bu yil ham.
Bu boshlagan ishim hamisha,
Oxiriga yetkazar ko'klam.

QALBINGGA
QULOQ SOL

Qalbingga quloq sol
tinglagil uni,
Eng mushkul paytda ham
undar safarga.
Bu hayot kurashga chog'lab har kuni,
Mardlarni chorlaydi
yangi zafarga.
Qalbingga quloq sol.

ZURRIYODLAR

Kun-u tunde almashar avlod,
Go'dak bo'lib boqib ziyoga.
So'ng, Yer yuzin yashartib bot-bot,
Bir-bir jo'nar boqiy dunyoga.

Qancha yashar – shirindir shuncha!
Umri jadal daryodek o'tar.
Kapalakdek yasholmay uncha,
Zurriyodin qoldirib ketar.

SHUKRONA

Nahordan to shomgacha
Tinim bilmay ishlaymiz.
Mudrab olib tonggacha,
Yana ishni boshlaymiz.

Shukrona ayt, dil, Haqqa,
Rizqing etmish ziyoda.
Ishlab, ololmay haqqin –
Yurganlar ko'p dunyoda.



Ustozlarimizning maqsadini Nukus shahrida o'tadigan «Barkamol avlod – 2008» Respublika sport musobaqasida ham mustahkamlamoqchimiz. Unda biz poytaxt sharafini g'olibona himoya qilishga shay turibmiz.

OLDIMIZDA YANGI DOVON

O'tgan yilni ancha sermahsul o'tkazdik. Kollejimiz polvonlari Angliya va Fransiya davlatlariga an'anaviy Islom Karimov xalqaro turnirlarida muvaffaqiyatli qatnashishdi.

Yutuqlarimizda ustozlarimiz Murod Do'simbetov, Nurbobo Tilakov hamda Azamat Boyqulovning saboqlari qo'l keldi.

Yaqinda Respublika Olimpiya zahiralari kollejida «Yoshlar yili»ga bag'ishlangan turnir tashkil etildi. Jizzax Olimpiya zahiralari kollejidagi o'n sakkiz kunlik o'quv mashg'ulotlarida ham ancha chiniqdik. Bu yerda Samarqand terma jamoasida shug'ullanayotgan tengdoshlarimiz bilan birga mashg'ulotlarda bo'ldik. Har birimizning oldimizda bitta vazifa, yangi dovon sari odimlash. Darhaqiqat, har bir viloyatda milliy sport turimizga

Sirdaryo viloyatida Shirin shaharchasi bor. U yerda Sirdaryo issiqlik elektr stansiyasi joylashgan. Shuning uchun bu shaharni «Nurchilar» shahri deb ham atashadi. Yana bu yerda ko'plab chempionlarni tarbiyalayotgan ajoyib sport klubi – «Nurchi» faoliyat yuritadi.



SHIRIN DEGAN SHAHARDA...

Siz akademik eshkak eshish bo'yicha «Osiyo o'yinlari – 2006» g'olibi Ruslan Naurzaliyev, 2007-yili o'tkazilgan qit'a chempionati sovrindorlari Vladimir Chernenko, Damir Naurzaliyev haqida eshitgan bo'lishingiz tabiiy. Ushbu sportchilar mamlakat chempionatining bir necha karra g'olibi ham sanalishadi. Ular aynan «Nurchi»dan chiqqan.

Shuningdek, shirinlik Yuriy Shoxsuvoryan, Sergey Ten, Sergey Bagdanov kabi akademik eshkak eshuvchilar o'tgan yili O'zbekiston chempionatida muvaffaqiyatli qatnashishgan. Ushbu terma jamoa a'zolari 2007-yili Moskvada tashkil etilgan xalqaro turnirda ham sovrindorlar qatoridan joy olganlar.

Agar sayohat qilib Sirdaryo tomonlarga borsangiz, albatta «Nurchi» klubiga ham sayr qiling. Klubda mo'jizaviy trenajor zallarini, sportchi bolalar uchun yaratilgan qulay sharoitlarni ko'rib, hayratda qolasiz.

Akademik eshkak eshish bo'yicha murabbiy Vasiliy Chikmenov shogirdlarining musobaqalarga katta tayyorgarlik ko'rayotganligidan faxrlanib ketasiz. Axir ularning murabbiyi qit'amizda tan olingan

mutaxassislardan biri bo'lganligi uchun ham shogirdlarini astoydil ishlashga o'rgatgan.


Ruslan Naurzaliyev va Vladimir Chernenkoni ham ayni mashg'ulotlar vaqtida uchratdik. Ular Germaniyada o'tadigan jahon chempionatiga tayyorgarlik bilan band ekanlar. Boisi, ular bu musobaqada «Pekin – 2008» o'yinlari uchun yo'llanmani qo'lga kiritishlari kerak-da.

Klubni aylanar ekanmiz, «Ijtimoiy himoya yili»da «Nurchi»ni ta'mirlash uchun «Sirdaryo «IES» ma'muriyati 14,4 mln., korxonada kasaba uyushma qo'mitasi esa 2,7 mln, so'm ajratganini eshitib, boshimiz ko'kka yetdi.

Shirin shahri aholisi bu obod majmuada shaxmat-shashka, stol tennisi, katta tennis, futbol, akademik eshkak eshish bilan shug'ullanish imkoniyatiga ega ekanligini ko'rib, yana ham quvondik.

Sportni ko'pehlik yoqtiradi. Ammo shirinliklar kabi muntazam shug'ullanish hammaning ham qo'lidan kelavermas ekan-da.

Biz u yerdan qaytar ekanmiz, «Nurchi»ni ular nega ardoqlashlariga tushunib yetdik...



qiziquvchilar ko'p ekan. Kechagina poytaxtimizda o'tgan musobaqada 500 nafardan oshiq polvonlar qatnashdi. Katta musobaqada men 71 kg. vazn toifasida gilamga chiqdim. Hayajonlisi bu vaznda 82 nafar kurashchi g'oliblikka da'vogar edi.

Biroq, mashg'ulotlar samarasi hamda turli xalqaro turnirlardagi ishtirokim raqiblar bilan bellashishda menga qo'l keldi. G'olib bo'ldim.

Shuningdek, 65 kg. vaznda Abror Jsmoilov, 77 kg. da Bahodir G'aniyev, 90 kg. vazn toifasida Boltaboy Boltayev hamda qizlardan Umida Matyoqubova (63 kg.) jamoadoshlarim ham musobaqaning oltin medallariga

sazovor bo'lishdi. Otabek Maqsudov, Zafar Farmonov, Xurshid Xudoyberdiyev, Jasur Jovliyev va Munisa Abdurazzoqova esa sovrindorlar safidan joy olishdi. Shu kunlarda biz kattalar o'rtasida o'tadigan O'zbekiston chempionatida qatnashdik. Navbat 14-15-mart kunlari Samarqandda Alibek polvon Primov xotira turniriga. Fransiya, Angliya kabi davlatlarda tashkil etiladigan an'anaviy turnirlar esa kuzda Turkiyada yoshlar o'rtasida kurash bo'yicha o'tadigan jahon chempionatiga muhim tayyorgarlik vazifasini o'taydi.

Demak, 2008-yil ham biz uchun g'alabalar bilan ajralib turadigan mavsum bo'ladi, deya umid qilamiz.

Yahyo IMOMOV,
Olimpiya zahiralari kolleji 3-bosqich talabasi

Sportning eng qadimiy turlaridan biri qilichbozlikdir. Qilichbozlik qadimiy Olimpiya sport turlari oilasiga ham mansubdir.

Yoshligidan «Uch mushketyor» filmini sevib tomosha qiladigan Saidjonning qilichbozlikka qiziqishi bolaligidan ayon edi.


Yurtimizda sportga berilayotgan e'tibor tufayli qiziqishlar o'rni intilish hissi egalladi.

Hozir Saidjon Abdullayev Buxoro viloyatida qilichbozlikni rivojlantirishga astoydil bel bog'lagan. Kerakli jihozlar va mutaxassislar zarurligini anglab izlanishdan charchamayapti.

Saidjon viloyatdagi keksa qilichbozlarni izlab topdi, maslahatlashdi. Uyda keraksiz matohga aylangan jihozlarni to'pladi. Poytaxtga borib, tajriba orttirdi. O'zbekiston qilichbozlik federatsiyasi prezidenti Sobir Ro'ziyev ko'magida poytaxtdan Buxoroga murabbiylarni olib keldi.

Shaharda viloyat madaniyat va sport ishlari boshqarmasiga qarashli 2-

BUXOROGA YANA BORAMIZ



ixtisoslashtirilgan bolalar va o'smirlar Olimpiya zahiralari sport maktabida qilichbozlik bo'limi tashkil etdi. Ikki yil deganda, qilichbozlik bilan shug'ullanuvchi bolalar sonini qirq nafarga yetkazdi.

Natijalar ham bo'y ko'rsatib qoldi. O'zbekiston kubogi musobaqasida Buxoro viloyati sharafini himoya qilgan Aida Hakimullina qilichbozlikning «sablya» turida birinchi, «rapira» da esa uchinchi o'rinni qo'lga kiritdi.

– Viloyatimizda farzandlarimiz o'rtasida qilichbozlikka qiziquvchilar ko'paymoqda, – deydi qilichbozlik federatsiyasi ijrochi direktori Saidjon Abdullayev. – Niyatimiz, yangi qurilayotgan Buxoro Olimpiya zahiralari kollejida qilichbozlik bo'yicha to'garaklarni ochish. Jihozlar masalasida «Za budushee fextovaniya» xalqaro xayriya jamg'armasi bilan hamkorlik qilish. Shu kungacha buxorolik yosh qilichbozlar yurtimiz bayram tantanalarida o'z ko'rgazmali chiqishlari bilan ishtirok etmoqdalar.

Iqtidorli sportchilarni tayyorlash maqsadimiz.

Shuning uchun bu yilgi O'zbekiston chempionatini shahrimizda o'tkazish niyatidamiz, deya yaxshi niyatlar qilgan yosh murabbiyga: «Biz ham sizning yoningizdamiz, barkamollik yo'lida aslo charchamang», deb madad bo'ldik.

Sahifani Ma'mura MADRAHIMOVA
tayyorladi

Yillar shamol, ortimdan yelar,
Oyi, sizga o'xshagim kelar!



BUG'DOYGA QATTIQ GAPIRMANG

Olimlar g'alati tajriba o'tkazdilar. Ular 100 dona bug'doyni olib, dasturxonga yoydilar. Keyin donalarni xivchin bilan kaltaklashdi, turli xil yaramas so'zlar aytib, ularning «jig'iga» tegishdi. Xullas, donlarni obdon xo'rlab, so'ng yerga ekdilar. O'z vaqtida sug'orib, qarab turishdi. Bug'doy donalarining 46 tasi unib chiqdi. Qolgan chirib ketibdi.

Endi olimlar boshqacha yo'l tutdilar. Tag'in 100 dona bug'doy olishdi. Uni kaftdan kaftga shopirib, o'pib, oqlab, toza «erkalatisdi». Donlar sha'niga she'r aytdilar, xullas, ularni ko'klarga ko'tarib maqtadilar. Va, nihoyat bu 100 dona ham yerga ekildi. Ne ajabki, bir necha kun o'tib, 100 ta donning... 96 tasi ko'karib chiqdi! Olimlar yoqa ushlab qolishdi. Demak, yaxshi so'z nainki odamlar yoki hayvonlarga, balki don-dunlarga ham yoqar ekan-da? Bu hodisa o'zbekning «Bug'doy noning bo'lmasa, bug'doy so'zing yo'qmi?» degan so'zini yodingizga solmaydimi?

S.QARNOQLI

Kitob javoningizga

CHAMANOYNING CHAMANI

G'afur G'ulom nomidagi nashriyat-matbaa ijodiy uyi Chamanoy Jonuzoqovanning «Diyorimning chamaniman» she'riy to'plamini chop etdi. Bu uning ilk kitobidir.

«Diyorimning chamaniman» deb nomlangan she'riy to'plamida nurotalik yosh she'riyat ixlosmandi Chamanoyning orzulari, Vatani, ota-onasi, o'zi yashayotgan makonga mehr-muhabbati, tabiatdan ilhom olishi o'z aksini topgan.

Chamanoy orzulari haqida shunday yozadi:

Qaniydi, dilimda borini

Aytolsam, aytolsam mayin shamolga.

U esa qulog'in yozib, osmonga

Orzuim oshirsa amalga!..

Yosh she'riyat ixlosmandi Chamanoy Jonuzoqovadan umidimiz katta. U katta umidlar bilan qo'liga qalam ushlab, ilhom sozini chertmoqda. Kelajakda katta shoira bo'lib, yurtimizni madh etishiga ishonchimiz komil.

Dildora RO'ZIMHAMMADOVA



BUGUNNING



«YANGI AVLOD» LARI

Sevib o'qiydigan asari: Xudoyberdi To'xtaboyevning «Sariq devni minib» asari.

Kino: A.Navoiy, Z.M.Bobur haqidagi filmlar.

Qo'shiqchisi: Og'abek Sobirov.

Sport turi: gimnastika.

Taomi: chuchvara.

Burji: hut (baliq).

Risolat Iskandarova she'r yozishdan tashqari rasm chizishga, kitob o'qishga qiziqadi.

Eng katta orzusi – xalq sevgan shoira bo'lish.

Ingliz va rus tilini o'rganishni o'z oldiga maqsad qilib olgan.

«Yangi avlod» bolalar ijodiyoti festivali unda katta taassurot qoldirdi:

– Muhtasham «Xalqlar do'stligi» saroyida bo'lib o'tgan festival qatnashchilari, ya'ni g'oliblarini taqdirlash vaqtida o'z zimni juda baxtiyor his etdim va bundan so'ng o'z ustimda ko'proq ishlab, yana-da yaxshi yutuqlarga erishishni maqsad qilib qo'ydim.

Ta'kidlash joizki, baliq burji ostida tug'ilgan insonlarda ijodkorlik qobiliyati mavjud bo'ladi.

Ijodkor qiz Risolatxonda ana shu xislatlarni sezdik, uning she'rilarida maftunkorlikni anglash mumkin.

Biz ham Risolatxonning kelgusi ishlarida omad tilaymiz!

Nazokatxon TOJIBOYEVA,
O'zbekiston Davlat jahon tillari universiteti talabasi





Risolat Iskandarova
1997-yil 17-martda
Xorazm viloyatida
tug'ilgan. 5-sonli
ixtisoslashgan
maktabning 5-sinf
o'quvchisi. «Yangi
avlod – 2007» bolalar
ijodiyoti festivali
«She'riyat» yo'nalishi
g'olibasi.
Yoqtirgan fani:
adabiyot.

RASMLAR KO'RSATMASI



Bolalikda kim ham rasm chizmaydi deysiz? Lekin orangizda shunday tengdoshlaringiz ham borki, chizgan rasmlarini ko'rib, qobiliyatlariga tan berasiz. Dilnoza Rahimjonova ana shunday iste'dodli

qizlardan biri. Shahrimizdagi 243-maktabning 7-«B» sinfida a'lo baholarga tahsil olayotgan qizaloq adabiyot, rasm, musiqa fanlariga juda qiziqadi. Ana shu qiziqish uni «Bolalar ijodiyoti uyi»ning tasviriy san'at to'garagiga yetakladi. Chizgan rasmlarida asosan tabiat go'zalliklarini tasvirlaydi va ular orqali tengdoshlarini tabiatni asrab-avaylashga chorlaydi.



BOSH MUHARRIR:
To'lqin HAYITOV

Dizayner va sahifalovchi:
Fazliddin SHOYODGOROV
Navbatchi:
Nafisa RUSTAMOVA

Gazeta O'zbekiston matbuot va axborot agentligida 0208-raqam bilan 2007-yil 2-fevralda ro'yxatdan o'tgan,

TAHRIR HAY'ATI:
Turobjon JO'RAYEV,
Dilbar ALIMJONOVA,
Qahramon QURANBOYEV,
Jabbor RAZZOQOV
(«O'zbekiston» NMIU Bosh muharrir o'rinbosari),
Dilmurod RAHMATILAYEV,
Dilshoda DADAJONOVA,
Feruz JALILOVA
(Bosh muharrir o'rinbosari),
Sobirjon SHARIPOV,
Ergashvoy SARIQOV.

Manzilimiz:
700129,
Toshkent shahri,
Navoiy ko'chasi, 30-uy.
Obuna indeksi: 198.
e-mail: tong1924@mail.ru
Tel: 144-27-25, 144-63-08
Tel./faks:
(99871) 144-38-10

Rassomlar:
Nodira MIRZAYEVA,
Feruz MATYOQUBOV

«O'zbekiston» nashriyat-matbaa ijodiy uyida chop etildi. Haftaning dushanba kuni chiqadi. Shakli A-3, 2 bosma taboq. Adadi - 59115 Buyurtma N: J 4854

Muassislar:

O'zbekiston matbuot va axborot agentligi,
O'zbekiston Respublikasi Xalq ta'limi vazirligi,
«KAMOLOT» yoshlar ijtimoiy harakati Markaziy Kengashi,
«SOG'LOM AVLOD UCHUN» hukumatga qarashli bo'lmagan xalqaro xayriya jamg'armasi.